

GAA-GII MAANZHIDOODAWINDWAA GE-IZHI-WIJI'AAGANIWIWAAPAN OMAA KANADA AKIING.



GAA-BAGAMISHKAAGEMAGAK GEGOO DAZHIKEWINING

Wegonen gaa-ijigaadeg Gaa-bagamishkaagemagak Gegoo Dazhiikewining?

Gaa-ozhibii'igaadeg iwe gaa-gii-izhi-maanzhidoodaagemak dazhiikewining gemaa ishkoniyaning awiya omaji-izhichigewin iwe gaa-izhinikaadeg "Gaa-bagamishkaagemagak Dazhiikewining". Awiya gaa-onjiid imaa dazhiikewining miigiwe iwe ozhibii'igan e-ganootamawaad gaa-ayaaniid imaa dazhiikewining. Igi dash dibaakonigeng gaa-ayaawaad o-da-agindaanaawaa iwe mazina'igan apii dibaakonaawaa ini gaa-gii-mamaanzhiinid.

Owe dinookaan ozhibii'igan wiindamaagemagan gaawiin wiin eta bezhig awiya gaa-maanzhidoodawind gii-mamaanzhiid awiya. Niibiwa awiyag imaa gaa-daawaad dazhiikewining obagamishkaagonaawaa. Ozhibii'igaade dash aaniin mayaa ezhibagamishkaagowaad igi gaa-daawaad imaa.

Awenen Ge-ozhibii'angiban iwe Gaa-bagamishkaagemagak Dazhiikewining?

Bezhiig odaapinaa dazhiikewining ji-ozhibii'ang iwe Gaa-bagamishkaagemagak Dazhiikewining. Maagizhaa wiin omaanzhidoodaagoon ini gemaa ogikendaan aaniin gaa-izhi-maanzhidoodawindwaa gakina. Ogo daabishkoo gaa-gii-ozhibii'amowaad iwe dinookaan ozhibii'igan: oko-izhichigewinan, oodenawan, oko-izhichigewinan anami'aawining inake, gaye Anishinaabe ishkoniyanan.

Oshkiya'iiwanoon na ini "Gaa-bagamishkaagemagak Dazhiikewining"?

Ginwenzhiish odoodaapinaanaawaan ono dinookaan ozhibii'iganan igi dibaakonigewigamigong gaa-anokiiwaad. 2011 gii-izhiseg, iwe (Criminal Code) Maanzhidoodamowin Mazina'igan gii-ikidoomagan ji-aabadakin ini dinookaan ozhibii'iganan awiya gii-wayezhichiged.

Dagobii'iganing 722.2 imaa Maanzhidoodamowin Mazina'iganing, gaa-gii-maajii-aabajichigaadeg Miskominigiizis 23. 2015 gii-izhiseg, gii-bagidinaawag gaa-ayaawaad dazhiikewining ji-ozhitoowaad ini ozhibii'iganan aaniin igo gaa-izhi-mamaanzhiid awe gaa-dibaakonind. Iwe 722.2 izhi-wiiji'iwemagan ji-gikendang dibaakonige-ogimaa ji-dibaakonaad awiyan gaa-gii-mamaanzhiinid.

Ganage Awiya o-daa-agindaan ji-noondawind iwe Gaa-bagamishkaagemagak Dazhiikewining?

Giishpin awiya andawendang ji-agindang iwe ozhibii'igan apii dibaakonind awe gaa-gii-maanzhidoodaaged, bizaanigo daa-bagidinaa ji-doodang imaa dibaakonigewigamigong. Bizaanigo gaye mazinaatesijigewin daa-ozhichigaade ji-dibaajimoomagak iwe Gaa-bagamishkaagemagak Dazhiikewining, ji-waabanjigaadeg dash dibaakonigewigamigong.

Bizaanigo gaye daa-gagwedwewag igi dazhiikewining gaa-onjiwaad ji-ayaawaawaad awiyan ge-wiidookaagowaad gemaa giishpin



Enendaagozid
ji-ayaad
wiindamaagewin



Enendaagozid
ji-ganawenimind



Enendaagozid
ji-dagwiid



Enendaagozid ji-gagwe-
debinaman ji-giwe-diba'
amaagooyin gaa-gii-wanitooyin



Enendaagozid
ji-maanaabandaman

andawendamowaad ji-aagawichigaadeg imaa, gemaa ji-michi-aabadak mazinaatesijigan gaawin dash memwaach o-daa-waabamaasiwaawaan ini gaa-gii-maanzhidoodaagowaad. Dibaakonige-ogimaa dash eta daa-ikido ono andooshkigaadegin.

Wegonen imaa ge-ozhibii'igaadegiban Gaa-bagamishkaagemagak Dazhiikewining?

Bezhiig mooshkinebii'igan gii-ozhichigaade ge-aabajitoowaapan gakina awiya. Imaa dash izhi-gagwedwemagan aaniin wenji-giigidootamawaad gakina awiya' imaa dazhiikewining awe gaa-ozhibii'ang. Awe dash gaa-ozhibii'ang da-dibaaajimo aaniin mayaa gaa-izhi-maanzhidoodaagowaad iwe, odinendamowiniwaang, owiiyawawaang gaye zhooniyaang onji, gaye giishpin e-gosaawaagwen ini gaa-gii-maanzhidoodaagenid, ji-maanzhidoodawindwaa odinawemaaganiwaa' gaye owiijiwaaganiwaa.

Bizaanigo wegonen igo daabishkoo mazinibii'igan gemaa bakaan dinookaan ozhibii'igan daa-dagonigaade imaa.

Aaniin Ge-izhi-miigiweng iwe Gaa-bagamishkaagemagak Dazhiikewining?

Endaso-akiinsing bakaan izhichigemagan ji-ozhichigaadeg iwe Gaa-bagamishkaagemagak Dazhiikewining. Daa-ondinigaade mooshkinebii'igan dakoniwigamigong gemaa dibaakonigewigamigong. Gi-daa-wiiji'igoo ji-mooshkinebii'aman iwe. Giizhitooyin dash, gi-daa-miinaa gaa-inanokiid imaa, gemaa gaa-ando-dibaakonaad gaa-maanzhidoodaminid.

Awe dash gaa-gii-maanzhidoodaaged gemaa odibaakonigewiniiman da-miinaa iwe mooshkinebii'igan ji-agindang. Awiya dash gaa-onjiid imaa dazhiikewining daa-gagwejiimaa gegoonan.

Aaniindi Eyaamagak Giyaabi Wiindamaagewin?

Giishpin giin gemaa awiya gaa-gikenimad gaa-maanzhidoodawind, gi-daa-wiiji'igoo. Gakina akiinsing ayaawan izhichigewinan e-wiiji'indwaa gaa-gii-maanzhidoodawindwaa. Gi-ga-wiiji'igoog giishpin gagwedweyin. Victim Services Director izhinikaade iwe ge-izhi-gagwedwe'amban.

<http://www.justice.gc.ca/eng/cj-jp/victims-victimes/vsd-rsv/index.html>